


O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

SULU IANUARI 2011

Faatonu: Ph. 27881, Cellphone: 7715037 - Main Office: Ph. 24414 - website: www.cccs.org.ws

Malumalu Fou i le Fanua ua ma'oti o le Aulotu EFKS i Lano



UA TINI LE FAAMOEMOE O LE faalaau o le vao. O le tofotofoga
lafu mamoe i Lano. Selau lava foi lea o le soifua faatuatua
valusefulu tausaga o nofo ae oia o le fanau a le Atua. E mamao

le ala; ma o faafitauli ma faigata
sa lu'itauina ai le talitonu i le
Atua, e le'i faigofie ona asaina.
Ua fai i lagi foi le folauga i le
toatele o tamafanau a le nuu, ae
le'i silasila. Latou te le'i asa le
vai o Ioritana, ae se'i o latou

silasila itulau e sosoo ai

AUKUSITINO:

Le Atalii o Loimata Maligi p.6

Malumalu Fou i le Fanua ma'oti mo le Aulotu EFKS i Lano

tuvae atu i so latou lava eleele. Se fanua ma'oti faale-tulafono mo lo latou malumalu ma le maota o le latou faafeagaiga.

E le fai mea tuu le Atua, ae fai mea lelei, ma fai mea mae'ae'a ma manuia. O taimi a le Atua e le o o tatou taimi. Fasefulu tausaga o Isaraelu i le vao. Ae 180 tausaga e le mautu se nofoaga o le EFKS i Lano. Peitai, o e faatalitali ma vaavaai atu i le Atua i le faatuatua, e toe pepese ma alalaga fialia i le Silisiliese, pe a oo ina tali mai o ia.

I le o sina tala lenei ua tuuina mai mo le Sulu Samoa, tau i le galuega sa fau ao, fau po, a le aulotu EFKS i Lalo, Savaii.

FAAVAE I LE ATUA, FAAAUAU E LE ATUA, FAAPUINA E LE ATUA

O le malumalu nei, o le tino lea o le finagalo alofa ma le faamaoni o le Atua i ona tagata tauivi ma taumafai ma le tiga e ala i le mataua itiiti o le faatuatua. O lenei taumafai, na fuafua e tagata, ae na faamauina faaleagaga e o matou matua faaleagaga i le anapogi ma le tatalo. O le faavae lea o lenei galuega. "Faavae i le Atua. Faaauau e le Atua ma Faaiuina e le Atua."

Ua 180 tausaga o le lotu LMS/EFKS i Samoa a o le uluai taimi lenei ua mautu ai faale-tulafono le nofoaga o le lotu i Lano nei. O le uluai falesa sa i le ogatotonu o Talalupelele, o loo iloga ai pea vali sima. Na soloai ane le matai e ese lana lotu, sa faasino iai lea fanua ona fe'ese'esea'i ai lea ma tama o le

Ekalesia. Ua siitia mai le falesa i le itu i Saute o Talalupelele ma e tolu ia falesa sa faia ai. E faia ia fesuiaiga o nofoaga o le falesa, ae o le faifeau sa nofo i Misamis, lea ua iai nei le isi lotu, toe sii mai i Vaipinena ma sa toe sii atu foi le faifeau i Moanalua, o le fanua tanu o le aulotu. Ua uma ona fua faale-tulafono lea fanua tanu, o le foa'i a Malaeculu Torise ma le aiga.

I le 1996, a o Tiakono Toeaina le Afioga i le Palemia i lea taimi, Afioga Tofilau Eti Alesana sa ia momoo ai i se fanua i uta nei e mafai ona tuufaatasi iai le galuega. O le 1998 na pulefaamau ai le foa'i lenei a le aiga o Faalavane ma faamauina ai loa faale-tulafono.

O Setema 2009 na finagalo ai le aulotu ina ia aloaia ia pulega faale-Ekalesia, o le mea e fulisia iai le finagalo o le aulotu o le mea lea e tataua ona fai ma faatino. O le amataga lea o le toe fuata'iga o pulega mai faiga tuai sa taofiofia ai le atiina'e o le lotu.

Ua tofia le taitaifono, sui taitaifono, failautusi, teutupe, sui o tama, sui o tina ma le a'oa'o aua ua leai se faifeau i lea vaiata.

Sa faataatia loa atiinae nei: fuaina loa ma resitara faale-tulafono le fanua; fausia le fale o le faifeau; toe faatulaga le maota o le galuega; aami loa le faifeau; tapena loa le malumalu ae se'i muamua maua se faifeau aua e taua le auai o le faifeau.

Ua uma ona faatulaga fuafuaga uma i totonu o le 52 aso (29 Novema 2009 - 29 Ianuari 2010). O le fesoasoani a alo ma fanau mai Niu Sila e NZ\$30,580 ma le Toomaga e \$25,000 na

faatino ai. I le umusaina o nei galuega i le aso 29/1/10 na lu'i ai i matou e le Toeaina Aliimau Manu F.T. ina ia aumai le falesa iinei. Sa matou tali atu e umusaina le malumalu i le aso 22-23 Tesema 2010 pe a aumai lo matou faifeau. O lenei ua faataunuu i le aso.

Ua aami le faifeau Susuga Terry Faiga F.S. ma Elena i le aso 5 Mati 2010. Ua faalua ona pasia i le finagalo o le aulotu, a ua iai ma le faifeau ma le faletua, ina ia siitia mai loa le falesa i le nofoaga lenei. O le tupe faavae o le falesa e \$68.25.

FALESA:

O le 22/5/10 sa faia ai le leitiofoni a o le aso 28/5/10 sa faia ai le taumafataga saili tupe i le Maota o Samoa i Vaitele.

O le umi o le falesa e 120ft, lautele e 48ft., auala savali i autafa e 4 1/2 futu. O le igoa o le falesa: "VAIPUNA O LE OLATAGA" na saunia lava e le Susuga ia Terry ma Elena.

E faafitu ona fesoasoani ane le aulotu Faapotopotoga a le Atua (Assembly of God) i Lano i nisi o vaega mamafa o le galuega, aua e toaititi le aulotu a Lano.

O le Aso Sa 11 Iulai 2010 na faia ai le lotu faafetai ma amata loa galuega i le Aso Gafua na sosoo ai. E tolu ma le afa masina na fai ai le galuega.

Na faaletonu le vaega muamua o le galuega ona ua matou faatamala ina ua le uma ona faatauina pepa o le *Corporate Dinner*, ua aumai foi tupe o pepa a ua le oo mai i le komiti, ua le uma foi ona ao tupe o le leitiofoni. E anoanoa'i faitioga, tuua'i aiga, upu taufaifai ae sa lotu lava iai le faifeau ma le faletua ma le komiti ma le aulotu toatele ina ia faaiuina lenei

faacacau itulau e 11

O LE LAUGA

Tusi Faitau: Esoto 3: 1-18

Matua: f. 14: "Ona fetalai mai lea o le Atua ia Mose, **O A'U O LE OLA, O LOO OLA LAVA**; ua ia fetalai mai foi, e te fai atu i le fanauga a Isaraelu, ia faapea, o **A'U O LE OLA**, o le na auina mai a'u ia te outou."

Manatu Autu: I tala atu o le vaofita o loo iai le Atua o le ola o loo soifua pea.

O se tala e manino ma o se tala foi e malamalama le tala ia Mose, i lona fanau mai i Aikupito, ma lona alu ese ai, ma aumau i le nuu o Mitiana, atoa ai ma lona valaauina e le Atua, e fai ma faaola i lona nuu o Isaraelu.

E tulaga ese ma ofoofogia le auala na faaoga e le Atua e fesootai mai ai i le na ia filifilia.

O le laau talatala na susunuina i le afi ae le faaumatia. E mumu saesae ma matua vela le afi ae tumau pea le laau talatala. O le faapogai lea o le fia matamata o Mose ona o le ofo tele i lenei mea. O le natura o le afi ma lona matautia - e susunu, e faaumatia, na te faamateina foi le laau seia liu efuefu. Ua le faapena, ma o se mea fou lea i lana vaai. Ma e iai se mea taua tele o loo ta'u mai i lona vaai o ofoofogia. O le faamoemoe o le Atua e le mate, e le matineia. O le afi e faaumatia ai, ua avea ma afi o le faamamaina. O le isi foi faamoemoe o le Atua, e iu ina tigaina Isaraelu i le pologa ma sauaga i Aikupito ae e le fano ai i latou aua o le a afio ifo lava le Atua e laveai.

O le afe ane o Mose i lenei mea na ia lagoinaina ai le siufofoga mai totonu o le laau: "Mose, 'aue e te faalatalata mai. Tatala ou seevae, aua ua sa le eleele ua e tu ai."

O le fesaga'iga a le Atua ma Mose i le mauga o Horepa na fa'aau'upegaina ai Mose ma faamalosi ai o ia e le Atua i le galuega ua finagalo i ai le Atua.

Afai ua faafitifitri Mose ma ua le mautonu i le mea e ao ina fai, ua sala lava ina faaletonu. Aua a faapefea ona toe fai atu i le nuu na alu ese leaga ai. E fa'i o Aikupito i lona fasi o lo latou tagata ma tanu i le oneone, a o lona lava nuu ma ona tagata na ia taumafai ai e vavao lo latou fe'ese'esea'i ae manu a'e le i'uileo: "O ai na tofia oe e fai ma faamasino ia te i matou?"

O lagona faale-tagata ia na titi'e a'e e fai ma vao fita e faalavelaveina le feau taua. I le manatu o Mose, o le toe foi i Aikupito, o le a faia ai loa lona faamasinoga ma ono tuuina i le falepuipui, aemaise foi le matamata ita o tagata o lona nuu o Isaraelu ona o le tigaina i avega mamafa ona o le pologa pe afai ae toe alu atu se tagata ma folafola atu o le a o ese ae te'i ua le taunuu.

Peitai o le afio ifo o le Atua ma faailoa ia Mose i le laau talatala ua susunuina ae le faaumatia, ua ia faamamaina ai Mose ma faapa'iaina, ua faasee foi i seevae o le tala lelei e logologo atu ai le faaolataga ua saunia e le Atua mo lona nuu.

Ua faailoa foi e le Atua lona Suafa e fai ma faamaoniga ia Isaraelu, ua

auina atu Mose e le Atua ia te i latou.

O A'U O LE OLA, O LOO OLA LAVA. O le Atua ia o Aperaamo, o Isaako ma lakopo. O le Atua o auga tupulaga uma. E fananau mai lea auga tupulaga ma toe mavae atu lea auga tupulaga, ae soifua lava la.

Tama e, ma tina e, o le tala lelei e le gata o e sa fita i tuga i le talaiga o le Tala Lelei ia lesu a o i latou foi ua afu lelea le soifua i le tautuaina o le galuega ma le le faalogologa tiga i totonu o aulotu. Malo tautua; malo tauivi; malo finau; malo loto tetele; malo faatuatua. Tou te ioe ma amene ua mafua ona outou oo mai i le taugagaifo o le la o lo outou soifua a o maua pea le malosi, ma ola ona tou te lei tuulafoaiina le Atua o le ola, ole o soifua pea. O le faamaoni lona alofa, ma e taunuu lava ana folafolaga. "Ou te ia te outou i aso uma lava". Uso ma tuafafine ia Keriso ma le aufaigaluega faaolioli o le Tala Lelei. A o toe faaauau galuega o lenei foi tausaga fou, aua nei galo. I tua atu o le vao fita o loo iai le Atua o le ola, o loo ola lava, e fesoasoani ia te i tatou i le galuega. O lea lava foi se fesoasoani mo le au filifilia i soo se tiute ma tofiga. E leai se mea e faigata i le Atua. Amene.

Epati Setefaon F.S.

Komesina o Fanua ma Fale

Women in Jesus' Time

In social life, few women would talk to men outside of their families, and a woman was to touch no man but her spouse. Yet Jesus associated freely with women and taught some as his disciples. A Samaritan woman who had been through five husbands, Jesus tapped to lead a spiritual revival. A prostitute's anointing, he accepted with gratitude. Women traveled with his band of followers, no doubt stirring up much gossip. Women populated Jesus' parables and illustrations, and frequently he did miracles on their behalf. According to biblical scholar Walter Wink, Jesus violated the mores of his time in every single encounter with women recorded in the four Gospels. Truly, as Paul would later say, in Christ "There is neither Jew nor Greek, slave nor free, male nor female....."

O Iesu e matua lelei i le faaupuina o se manatu

Ia tatou faamasani i le fai mea pupuu, ae maamaai. Malosi. O'oo'o. Manino. Faigofie ona malamalama iai tagata. Tosina gofie iai manatu ma lagona. Ma manatua gofie e tagata ma ola ai.

Aua le soona faatumuina i upu e le aoga; upu e leai so latou sao i le manatu. Upu e le o fesoasoani i le faamaninoina atili o le manatu. Fati ese lala pepe; lala e mamate. Faaaoga upu faigofie, taatele, ina ia malamalama ai ni tagata e toatele, ae le na o se vaega o tagata e malamalama ai. Faaaoga le gagana e aoga mo tagata ae le mo oe.

O Iesu na aoa mai ia i tatou le fai mea pupuu, ae o'oo'o ifo i lagona o tagata, malamalama lelei ai tagata i ana a'oa'oga. O le mea lenei na ia faaogaina ai faataoto.

O lana lauga ta'uta'ua i luga o le mauga, (Mataio 5-7), e mafai ona faitauina i minute e 10. (Ua faaiu e Iesu o nei upu, ona matua taufai ofo ai lea o le motu o tagata i lana a'oa'oga - Mat. 7:28).

O lana lauga i luga o le mauga, e pupuu ma maamaai ona lafoga:

Amuia e matitiva i le agaga; aua e o latou le malo o le lagi.

Amuia e faanoanoa, aua e faamafanafanaina i latou.

Amuia e agamalu; aua e fai mo latou tofi le nuu.

Amuia e fia aai ma fia inu i le amiotonu; aua e maona i latou.

Amuia e alolofa atu; aua e alofaina mai i latou.

Amuia e loto mama; aua latou te iloa atu le Atua.

Amuia e faatupuina le filemu; aua e ta'ua i latou o atalii o le Atua.

Amuia e sauaina ona o le amiotonu; aua e o latou le malo o le lagi.

Aua tou te faamasino atu, ina ne'i faamasinoina outou.

Ia outou ole atu, ona foaiina mai ai lea ia te outou;

ia outou saili, ona outou maua ai lea;

ia outou tu'itu'itu, ona toina ai lea ia te outou.

O lenei, aua tou te popole i le aso a taeao; aua e popole le aso a taeao i ana lava mea.

O lenei, ia atoatoa ona lelei o la outou amio; e pei o lo outou Tama o i le lagi e atoatoa ona lelei o ia.

Se a le mea e te vaai atu ai i si fasi laau i le mata o lou uso; ae te le iloa e oe le utupoto i lou lava mata?

O le tala a Iesu e aupito sili ona lauiloa ma fiafia iai tagata o le lalolagi, le tala i le Atalii Faamaumaumea, e na o le 90 ni sekone e faitau ai. (Luka 15:11-32).

Na ia faapuupuina le tatalo i ni vaega pupuu se lima. (Mat. 6:9-13).

Tasi lava le tali puupu na ia faia na le toe gagana ai i latou na tetee ia te ia. (Ioane 8:7: O so outou e leai sa na agasala, ia lua'i togi se maa ia te ia!)

Na o le tasi le fuaiupu na ia lavea'iina ai le agaga o le tagata agasala. (Luka 23:43: "E moni ou te fai atu ia te oe, o le aso ta te faatasi ai ma au i parataiso.)

E na o le tolu fuaiupu na ia

aofa'i atoaina ai le tulafono atoa. (Mareko 12: 30-31: Ia e alofa foi i le Alii lou Atua ma lou loto atoa, ma lou agaga atoa, ma lou manatu atoa, ma lou malosia atoa. O lona lua lenei, Ia e alofa atu i le lua te tuaoi ia pei o oe lava ia te oe. E leai lava se tasi poloaiga e sili i na poloaiga.)

Na ia fu'e ana aoaoga uma i totonu o le poloaiga e tasi. (Ioane 15:12: O la'u poloaiga lenei, ia outou fealofani, pei ona ou alofa atu ia te outou.)

E le mafai i le laau lelei ona fua mai i fua leaga, e le mafai foi i le laau leaga ona fua mai i fua lelei.

Fai mai tagata popoto o le lalolagi i mea tau a'oa'oga, poo mea tau faafaia'oga, o Iesu le faiaoga aupito sili ona lelei ana metotia na ia faaogaina mo le momoliina atu o ana aoaoga i tagata ina ia malamalama lelei iai, ma mulimuli ai.

O nisi nei o nai tusiga pupuu e aoga e faaaoa iai:

Aua e te tatalo i le Atua ina ia ia faia le mea e te mana'o iai. Tatalo i le Atua ina ia faia le mea e finagalo o ia iai mo oe.

E lei tu'itu'ia i le satauro le Atua i ni fao. O le alofa.

E leai se tagata e le aoga i luma o le Atua.

Ina ua afio Iesu i le lagi, na te le'i tapunia le faitotoa o lona fale.

O le loto o le tagata na o totonu e mafai ona tatala mai ai. E le mafai ona tatalaina atu i fafo.

Max Lucado, i lana tusi:
When God Whispers Your Name
faamatalina ma faaopopo e
Afemata T. Apelu Aiavao

'Faauta, o le tagata 'aitele ma le inu uaina': Iesu ma le 'Au-Faalaa

Faatomuaga:

O le faamoemoe o leni pepa, o le toe autala teisi o le amio o tuua'ia ai Iesu, 'o le tagata 'aitele ma le inu uaina'. O le auga lava, o le asia o le tuuaiga ma lona pogai ina ia iloa ai foi le uiga tonu o le tuuaiga, ae poo le a foi le faamoemoe o Iesu na ia faia ai lea amio a o feagai ai ma lana galuega faaola i eleele o Kalilaia ma Iutaia. E iai le taofiga o le pepa, o le faalaa e vaavaalua ma le talia e Iesu o faaifea e taligasua ma taumafataga, o loo afifi ai ma lona talia o tagata agasala, le au faalaa, ona o lona tiute e tatau lava ona fai mo i latou ia sa mulimuli ane ia te ia, o le talimalo.

O le ulutala o le pepa, o loo iai le faaupuga 'o le tagata aitele ma le inu uaina' o se upu taufaifai i tagata e ulufale i maota ma fale o fai ai taligasua o le afiafi aunoa ma le valaauina. O se tagata ese, e le o se tagata o le aiga o le e ana le taumafataga (host), e le o se uo foi a se tasi o alo faaloaloga (guest) o e na valaauina faapitoa i le taumafataga. E ta'ua i le gagana Eleni tagata ia o akietoi.

O le taofi o le pepa e tali tutusa ma le tagata faalaa i la tatou gagana. O loo ta'ua i le tusi a Pratt, o le faalaa o le tagata ese, e le o se tagata o se aiga. I sina sailiga i le uiga o le upu ma lona faaaogaina, sa matauina ai le tele o taofi eseese. Peitai, e mafuli finagalo ma manatu, o le faalaa o le tagata ese sa le tatau ona i ai pe auai i se mea o fai. O le uiga lea o le 'faalaa' o loo faaaogaina ai i le pepa. Faatasi ai la ma le faaaogaina o le upu 'faalaa' e faamatala ai le tagata vae'ai, pei ona sa masani ona faaaogaina i totonu o leni aai, ona iai lea o se uiga - o le faalaa, o le tagata vaesavalivali i maota ma laoa

o fai ai taumafataga, tusa lava pe lei valaauina, pe tau foi i e o fai le faigaai.

Iesu: le 'tagata 'aitele ma le inu uaina'

O le manatu faavae o le pepa e afua mai i se taofiga o se faiga sa masani a' i Iesu, o le auai i faigaai e aunoa ma le valaauina. Pei ona ta'ua i le Luka 7:34 (Mataio 11:19) "Ua sau le Atalii o le tagata, ua ai o ia ma inu; ona outou fai ane lea, 'Faauta, o le tagata 'aitele ma le inu uaina, o le uo a tagata ao lafoga ma e agasala.'" E atagia i le fuaitau lea, o Iesu sa faitaulia i e ta'ua o 'faalaa' poo akietoi. O ia foi faaupuga e masani ona faamatalaina o ni tuuaiga faaleaga tagata o loo faasaga ia Iesu. Peitai, o se tasi o aga masani i ia ona po, e aofia ai foi ma tagata Isaraelu femalagaai, ma tagata matitiva o ia taimi, o le faalaa: o le iloa o fale o fai ai faigaai ona alu lea i ai e saili se meaai ma se uaina.

I aganuu a Isaraelu, e taua tele le talimalo (hospitality). O le uiga faavae o le upu 'talimalo' o le faaalaa o le agaga alofa i tagata faimalaga, tagata e le masani ai, tagata ese, poo tagata foi o fai ma fili. O le faiva talimalo, e aofia ai se taumafataga ma le malologa o le po, poo ni nai aso foi e ofoina i soo se tagata lava e afea se fale. E mafua mai lea aganuu i le talitonuga, e puipui ma laveaiina e le Atua tagata ese ma tagata faimalaga i feau tatau. E iai foi se taofiga o le musu e talimalo ma le alofa i tagata fegasoloi, e ono avefa ma ala o le oo mai o mala; a o le fiafia e talimalo e auala mai ai faamanuiaga mai le Atua.

O loo manino lea mafaufauga i le tala o loo faamauiina i le Kenese 18,

i le taligamlo ma le agalelei o Aperamo i le malaga a tagata ese na uia lona lumafale. Ae na oo le mala tele ia Sotoma ma Komoro ona o lo latou le talia o malo (Esek 16:49; Mataio 10:15). O loo atagia foi i le Mataio 10:11-15 le taua lava o leni aganuu o le talimalo. Ina ua poloaiina e le Alii ona soo e o atu e talai le Tala Lelei, na ia faatonu ina ia faamanuia i e tali leleia i latou, ae a le tali leleia i latou "ia tutu atu le eleele nai o latou vae", o le faailoga o le le ofoina iai o faamanuiaga, ma ua motusia ai le sootaga.

E taua foi le talimalo i aganuu a tagata Eleni ma Roma (Graeco-Roman) i le vaitau na soifua ai le Alii. E leai foi se eseese tele o manatu faavae o talitonuga o tagata Eleni, Roma, ma Isaraelu. I le aganuu talimalo o tagata Eleni ma Roma, e le faasaina tagata e le'i valaauina i se taumafataga. E tatala lava le avanoa mo i latou ia, e maua mai ai se fasi meaai ma se ipu uaina e faamalie ai le fia taumafa. E le afaina foi i le o talimalo, le auai mai o ana malo faaloaloga ma ni a latou uo, e aunoa ma le tau faailoa i le o talimalo. E ta'ua i latou ia o *umbroi* (shadows), poo i latou e o mai ona o uo a malo faaloaloga.

O le aganuu o le talimalo e iloa ai le tulaga o le tagata i totonu o se nuu ma le malo o Roma. A taua ma taualoa ni malo o iai i se faaifea - o le faailoga o le maualuga o le tulaga o le o loo talimalo; a toatele foi tagata e le'i valaauina, *akletoi* - tasi lea faailoga o le taua ma le maualuga o le tulaga o le o loo talimalo i totonu o lea aai, aua tasi lea faamanuiaga e maua mai i *akletoi*, o lo latou talai atu o le agalelei o le o talimalo.

faaauau itulau e sosoo ai

A Page for Youth

Itulau mo Tupulaga Talavou

AUKUSITINO:

Le Atalii o Loimata Maligi

E LE LELEI LE OLAGA O AUKUSITINO A O talavou. E ui lava sa a'oa'oina lelei o ia e lona tina o Monika i talitonuga faa-kerisiano, ma tatalo, peitai o le ma'ama'ai o le fai'ai o Aukusitino, sa fai lea ma mea e matua popole ai lona tina. O se tasi aso, a o talavou lava Aukusitino, na ia faaali ai i lona tina, ua le toe talitonu o ia i mea o a'oa'oina atu e lona tina e uiga ia Kerisiano, ma isi talitonuga uma o tagata Kerisiano. Ae o le a liliu o ia i isi talitonuga o loo taatele i ia aso. Ona liliu ai lea o Aukusitino ma ola i le olaga o le faitaaga ma le tele o isi amio leaga ma le le taupulea. O Aukusitino foi, o se tagata e le 'afa'afa ona ia fai o se mea. E fai lava i le mea e gata mai ai lona malosi ma lona mafai. Sa aupito sili ona lelei o ia i le aoga, ma sili i vasega sa iai. Liliu atu i le faitaaga, e aupito sili ona salalau tala o lona faitaaga ma le amio leaga. E sili lava

o ia i mea leaga uma o fai e lana tupulaga.

Fai mai o ia i se tausaga mulimuli ane, ua na le iloa le tuaoi o le alofa mama, ma le tu'inanau o le tino. Ua mili faatasi ma ua leiloa ai le lelei ma le leaga. Ua matua lopala o ia i tu'inanau o le tino. Ua faaleagaina le suauu lelei o faauooga i lona tu'inanau le mafua'afuaina. Ua felafoa'iina foi o ia i peau o lona tu'inanau. Ae fai mai a ia, i ia tausaga a o mamao o ia ma le Atua, sa onosai pea le Atua.

O le tala ia Aukusitino, o le tala foi lea ia i tatou. O le fulitua i le mea sa talitonu ma faatuatua iai, e mafua mai pe a oo ina osofa'ia le tagata i tu'inanau o le tino. O le taimi lea ua pogisa ai le vaai ma lagona i mea e lelei, a ua luluti le tino i ona tu'inanau. Tasi le mea ua fia oo iai, o le faataunuu o le tu'inanau.

I ia tausaga e tele na fulitua ai Aukusitino i talitonuga o lona tina ma le

Au Kerisiano, sa tatalo pea Monika, ma loimata, i le po ma le ao. Sa tatalo o ia i taimi o agasala ai lana tama. Sa tatalo o ia i tausaga o ola o ia i uiga leaga. Sa tatalo foi o ia i tausaga sa fagatua ai lana tama ma le Atua. E le'i tuulafoa'iina lava, pe faagaloina e Monika lana tama i ana talosaga i le ao ma le po, i lea aso, ma lea aso, ma lea aso.

Fai mai lana tatalo i le Atua i se tausaga ina ua foi mai o ia mai le leaga:

'Tusa ua iva tausaga ua mavae, i ia aso o o'u lopala i le lua pogisa o talitonuga sese.....I ia aso uma, sa tutumau pea ma le le faavaivai, le tina, i le tatalo i le po ma le ao, ma sii atu i ou luma i ona loimata maligi, le mataupu e uiga ia te a'u, lana tama. Ua faafia ona oo atu ana tatalo i ou luma, ae sa e tuua lava a'u ou te lopala ai pea ma toe lopala ai pea i le pogisa o ia mea leaga uma na ou fai.'

A o ia tausaga a o fulitua mai lana tama ia te ia ma ona talitonuga faa-kerisiano, e le'i faigofie ia Monika. Na matua mafatia, ma lu'itauina lona faatuatua i le Atua. Ae le'i faavaivai ai o ia i le tatalo. Sa sii atu pea lana tama i luma o le Atua Silisiliese, i ona loimata maligi, i le ao ma le po, po ma le ao!

Ona oo ai lea i se isi aso, ua alu i le

'Faauta, o le tagata 'aitele ma le inu uaina': Iesu ma le 'Au-Faalaa

Peitai, pei lava o le gasologa masani o le olaga, a soona fai foi le avanoa, ona leaga lea o se mea. O loo maua i suesuega mai tusitusiga a nisi tusitala Eleni ma Roma, o le vaitau o le uluai seneturi (1-100 AD) na iloa ai ua faateleina na'ua tagata e saili taumafa i la'o'ai a e maumea ma lelei o latou tamaoiga. Ua faasolo i se tulaga ua le gafa taulimaina e i latou ia lea foi aganuu. Mai le vaitau lava lea, o loo maua i nisi o fetusiaiga a tagata Roma, aemaise lava i tagata mauoloa ma e maualuluga tulaga i le faigamalo, le alia'i ai o le faaaogaina o le upu Eleni o le *parasitos* (parasite) mai lona veape

o le *parasiteo*, o se upu taufaifai. A o le upu lava ia o le *parasitos* o lona uiga taatele o le 'tagata e 'ai i le fale o le isi tagata'. Ae ina ua avea foi le aisoo ma faafitauli, lea la na amata ai ona avea le *parasitos* ma gao, poo se upu taufaifai mo le tagata ua amioa'i i le ai ma ola i le malosi o le isi tagata.

E oo mai la i le taimi o le Feagaiga Fou, o loo atagia i nisi o tala o faamauina ai le amio lea o le faalaa. I le tuuaiga o loo faasaga ia Iesu i le Luka 7:34 - o le tagata 'aitele ma le inu uaina - e mafua mai i le amio o le faalaa, ae o le faalaa ua lavea i le uiga faifai o le *parasito*, o le

tagata e ola i meaai e maua fua mai isi.

O se tasi o fesili e tupu ae i le matauina o le faiga o lea foi aganuu i le vaitau na soifua ai le Alii, pe faapefea ona ulufale le au 'faalaa' i fale i le taimi o taligasua. O se fesoasoani mai nisi o suesuega - ua iai suiga i le fausaga o maota ma fale i le vaitaimi o le uluai seneturi. O se suiga o loo matauina na amata faatupulaia mai le taufaaiiuga o le seneturi mulimuli a o lumanai ai le Mesia (TLM). Ua fausia fale i le faataotoga na matua'ina e Pompeii, ua taua o le open-plan dwelling. O ia fausaga e pito i luma le vaega malolo o le fale (vestibule), sosoo lea ma le vaega o le fale e fai ai

faaacau itulau e 8

A Page for Youth

Itulau mo Tupulaga Talavou

AUKUSITINO:

Le Atalii o Loimata Maligi

epikopo, o se tagata e ola i le faatuatua, ma e malamalama lelei i tusitusiga pa'ia o le finagalo o le Atua. Na talosaga o ia i le epikopo, ina ia ia alofa ma talanoa ia Aukusitino, ina ia lafoa'i ona talitonuga sese ae foi mai. Ae le'i talia e le epikopo. Oua ua faalogo le epikopo i le lelei o le mafafau ma le finauina e Aukusitino o se mataupu. E matua lelei i le felafolafoa'iga o mafafauga.

O le fautuaga a le epikopo, ona o le fai'ai o Aukusitino e matua ma'ama'ai, e oo lava ina ia iloa le mea moni ma le sa'o, ona toe foi mai ai lea. Peitai e lei faamalieina Monika i ia upu. A ua augani atu ma le tagi i le faifeau ma loimata maligi. Na oo lava ina fiu le faifeau i le tauanau mai a Monika, ma le tuia foi o lona loto i le alofa i le fafine i lona tagi pea mo lana tama. Oua fai atu ai lea o le faifeau ia Monika: "Alu ia! Alu! Tuu a'u soia e te toe faalavelave mai! Oia pea e pei ona e masani ai. E le mafai e se atalii o ni loimata maligi faapea ona pa'u atu i le malaia!" O upu e mamafa, ae filo ai ma le

gaulofa.

Peitai, sa faaauau pea ona sola ese ma le Atua le atalii o loimata maligi, sola ese ma lona tina. E tele tausaga o leiloa o ia i le lalolagi o le agasala.

A o se tasi aso na faalogologo ai o ia ia Sagato Apeperose, o le epikopo o Milana ma o ia o le kerisiano aupito sili ona lauiloa i ia vai tausaga. Na oo ifo ai ia te ia le salamo ma le fiu i mea leaga ma le agasala o loo ia ola ai. Oua ia liliu ai lea ma foi atu ia lesu, i le tausaga e 386.

O Aukusitino, poo Sagato Aukusitino e pei ona lauiloa ai i tausaga mulimuli ane, na ia suia atoa le gasologa o le talafaasolopito o le lalolagi, e pei ona faamaumauina e kerisiano, ma nisi o tagata popoto o le lalolagi, sa faamaumauina le talafaasolopito i na ona po. O ana tusitusiga ma ona talitonuga, ua aupito sili ona su'esu'eina e tagata i lo se isi lava tagata i ia senituri e tele ua mavae. Ua faataunuuna faafia e Aukusitino i lona olaga ina ua toe liliu mai i le Atua, ia moomooga ma talosaga a lona

tina. Fai mai talitonuga o nisi, o Aukusitino, o le mali lea na faaogaina e le Atua, e faasusuluina atu ai le Tala Lelei o le Feagaiga Fou i le lalolagi, ina ua malepelepe le malo faapaupau o Roma sa iai ma avea ma malo Kerisiano.

O Aukusitino, na fanau i Tagaste, o se nuu i Aferika i le mea lea ua iai nei le malo Isalama o Algeria, e tusa o le 200 tausaga a o lei vaeluaina le Ekalesia Kerisiano i le Ekalesia Katoliko, ma le Ekalesia Porotesano lea na amata mai i le vai taimi o Matini Luteru ma isi o e na latou toe fuata'iina le Ekalesia Kerisiano ma latou o ese mai ai mai le Ekalesia Katoliko. O lona tama o se tagata faapaupau e le talitonu i le Atua. Peitai ina ua lata ina maliu o ia, ona ia liliu ai lea i le Atua, ma papatisoia ai o ia e avea ma Kerisiano.

E le tele ni aso talu ona toe foi mai Aukusitino i le Atua, ae fai atu lona tina ia ia, ua le o toe iai se mea e tatau ai ona ola pea o ia (Monika), aua o lea ua taunuu lana sailiga ma loimata i lana tama na leiloa, a ua toe foi mai ia lesu. E na o le iva aso talu ona fai atu ia upu e Monika i lana tama o Aukusitino, ae maliu o ia. A ua taunuu le mea sa tatalo ai i le Atua ma loimata maligi, ina ia toe foi mai lana tama i le Atua.

I ni tausaga mulimuli ane, ona fai ai lea e le Ekalesia Katoliko o Monika, ma tagata pa'ia - poo Sagato Monika.

tusia e Bell Graham
faaliliuina e Afemata T. Apelu Aiavao

Aisea na fia avea ai ma faifeau

E masani lava ona ma feiloai ma se faifeau uiga toafilemu ma le fai tonu ma fautu lelei. E le ni talanoaga i ni mea faigata o tutupu i le aai o ma iai. E talatalanoa lava i le uiga o le tau, le mananaia o lanu o laulaau ma fugalaau o paka o tafaoga. Matamata foi i le fegasoloai o tagata.

A o se tasi aoauli sa ma talatalanoa ai, o le a le mafai ona galo ia te a'u. O se aso

malulu ma sa ma nonofo i luma o se afi mumu malie e faamafanafana ai le fale. O le aso lea na ou fesilisili ai i le faifeau. Faato'a ou faitau i le vaiaso lava lea e uiga i le faifeau lava lea, a o tautua o ia i le ami a Amerika i aso o le Taua Tele Lonalua a le Lalolagi - 1939-1945. O ia o se tasi o fitafita o vaega'au a Amerika na mua'i taunuu i Takau (Dachau) i Siamani, e faasaoloto fitafita o

loo faapagotaina ai e Siamani i Takau. Na ou fesilisili iai poo a ni ona lagona ina ua vaai i le nofoaga leaga lea sa lokaina ai fitafita a Amerika, ma isi atunuu sa afaatasi e tau ma Siamani. Sa logologoa tala salalau mai i uiga leaga sa faia i fitafita sa lokaina ai. Mama'i, pa'e'e'e, sauaina, fia 'a'ai. Amata faigaluega i le itula e tolu i le

faaauau itulau e 9

A Page for Youth

Itulau mo Tupulaga Talavou

St. Augustine -

354-430

St. Augustine said, "From my tenderest infancy, I have in a manner sucked with my mother's milk that name of my Saviour Thy Son; I kept it in the recesses of my heart....."

After years in the world of sin and rejection of his mother's Christian faith, Augustine returned to God, and later possessed the certainty that Jesus Christ is the only way to truth and salvation.

To carry out his idea of a perfect life, he sold his goods and giv-

ing the proceeds to the poor. Then he began to live a common life in poverty, prayer, and the study of sacred letters.

Augustine believed that true philosophy is inseparable from Christianity.

Augustine's thought has had a profound impact on both Catholicism (in his doctrine of the church), and Protestantism (especially in his concept of salvation).

la tatou savavali ma le matagofie

O le fesoua'iina o mafaufauga o Aukusitino na oo ina pa faama'i a o nofonofo o ia i se togalaau, (garden) ia Aokuso i le tausaga e 386, a o loo matua faaletonu lona mafaufau i le le mautonu ma peiseai ua leai sona malosi e fai ai se faaiuga. Na oo lava ina tagi ai ma aioi i le Atua,

ae te'i ua ia faalogoina se leo e peiseai o se tamaitiiti o fai sa na taaloga i upu nei: "Ave e faitau! Ave e faitau!" Na manatu o ia o se faailoga lea mai le Atua, ona tatala ai lea e Aukusitino le kopi o tusi a Paulo ma faitau le mea na tau muamua lava iai ona mata, o le Roma 13:13-14:

"Ia tatou savavali ma le matagofie e tusa i le ao, 'aua le poula ma le ona, 'aua le faitaaga ma le mataaitu, 'aua le femisaa'i ma le matau'a. A ia outou oofu i le Alii o Iesu Keriso; 'aua foi le sauniuni mo le tino, e oo ai ona tu'inanau."

Talitonu Aukusitino, na o Iesu lava le ala i le upu moni (truth), ma le ola (salvation).

'Faauta, o le tagata 'aitele ma le inu uaina': Iesu ma le 'Au-Faalaa

talisuaga (atrium), e leai se puipui e vavae ai vaega ia o le fale. Faato'a maua ni puipui i vaega o iai potu moe o le fale. Lona uiga, o fausaga fou ia o fale ma maota i ia vaitau, ua faafaigofie ai foi i tagata faalaa ona ulufale i taimi o taligasua e saili meaai.

O loo atagia foi i nisi o tala i le Feagaiga Fou ia fausaga o fale pei ona taua. Mareko 6:10 o loo iai le poloaiga a Iesu i le toatinoagafulu ma le toalua. "O se mea tou te ulu atu ai i se fale, ia outou nonofo ai i le tou o ai." Faaaogaina i le fuaitau lea le faaupuga Eleni o le *eiselthe eis oikian*, lona uiga o le ulufale i totonu, e le o le tu i fafo o le fale. O le upu lava foi lea o loo faaaogaina i le Luka 9:4 ma le 10:5.

O loo manino mai lona faaaogaina i le Mataio 10:12. O le upu o loo faaaogaina o le

eiserchomenoi poo le ulufale, e tasi lava le upu faavae (root) o ia upu. Peitai o le taimi (tense) oloo aumai e le upu mo le 'ulufale' ia sosoo ma le taimi e ofo alofa atu ai'. Lona uiga, e muamua ulufale, ona faatoa ofo alofa ai lea. Pau lava sina ese teisi o le Mataio 10:12, ona o le poloaiga - ia 'ofu alofa atu' pe 'faamanuia' atu - e tuuina atu mo le fale (oikian) i le gagana Eleni. O loo faaliliuina i le Tusi Paia Samoa le oikian o le 'aiga' - atonu e mafua ona o le mafaufauga o le fale ma lona anofale. Mai mau pei ona ta'ua, o loo atagia ai o fausaga o fale ma maota sa taatele i ia ona po, e muamua ulufale aunoa ma le faatali i se faatagaga e ulufale ai. Atonu e tali tutusa lava ma maota poo laoa o Samoa e ulufale muamua, alaala i lalo, ona fai ai loa lea o le savali.

Iesu o le Malo (Guest), e le o se Talimalo (host)

I tala o ta'ua ai taligasua a le Alii, e manino mai o Iesu o le malo (guest), ae le o se tasi o talimalo (host). I le Luka 15:1-2: "Ua faalatalata ia te ia tagata ao lafoga uma ma e agasala, e faalogologo ia te ia. Ona muimui ai lea o le au faresaio ma le au tusiupu, ua faapea ane, 'Ua talia e lenei tagata o e agasala, ua aai faatasi foi o ia ma i latou'." I le faauigaga masani o fuaiupu ia, muamua, o Iesu o loo talimalo. Lona lua, ona o le ta'ua o tagata ao lafoga ma e agasala i le fuaiupu muamua, e manatu ai nisi o le faaupuga o loo sosoo mai (f.20, 'ua talia e lenei tagata o e agasala, ua aai faatasi foi o ia ma i latou', e faatatau i tagata ao lafoga ma e agasala, o loo aai faatasi ma Iesu.

Peitai, e ese se finauga e fia faatulai e le pepa e afua mai i le

faaauau itulau e sosoo ai

A Page for Youth

Itulau mo Tupulaga Talavou

'Aisea na fia avea ai ma faifeau

vaveao, ae faato'a malolo i le itula e 9 i le po. Sasa ma tatu'i i fana pe a pa'u'u i lalo i le lelava ma le vaivai.

Ua vaai ese le faifeau, pei e taula'i lana vaai i se mea mamao mamao lava i tafatafa'ilagi. Pe atoa lelei lava se minute na te le'i tali mai lava i la'u fesili. Pei o loo tau mafafau, ma tau toso mai vaaiga sa ia iloa i le tusa o le 40 tausaga ua mavae, i Takau.

Ona amata ai lea ona faamatala, mo le tusa o le afa itula, mea na ia vaai iai i le nofoaga i Takau sa faafalepuipui ai pagota fitafita o le taua. Ua ia toe manatua le manogi leaga o le nofoaga, le manogi leaga o pagota, le matua manogi leaga o mea e nonofo ai; o vaaiga eseese faamomoi loto. Aemaise lava le manogi leaga o fitafita ona e le ta'e'ele ae na

o le vaai ma tausii e pei o ni meaola. Taatitia ai lava isi i o latou moega laupapa malo, ua matua pa'e'e'e, ma leaga ai lava ia latou fe'au ua fai ai lava.

O manogi o le ta'e'ele i aso e tele; o manogi o tino oti; o manogi o fe'au ua fai ai lava i moega, ma faatalitali ai i le oti. E le'i sauniunia i latou mo ia vaaiga, ma ia manogi leaga.

O mea ia na faafetauia i latou ina ua latou taunuu atu i Takau, o se nofoaga e lata i se tasi o aai tele o Siamani, o Munich.

Fai mai le tala a le faifeau, "Ona tofi ai lea o ma'ua ma sa'u uo fitafita, i se loli tele e maualuga le puipui o lona pusa i tua. I totonu o le pusa o le loli, o loo fatufatu ai tino oti o fitafita a Amerika ma nisi o malo sa latou 'au faatasi. Fatufatu pei ona fatufatu lelei se uta fafie a se loli ina ia ofi ma taatitia lelei.

E feua'i tino ina ia ofi lelei ma tele ni tino e uta i luga o le loli. O le ma galuega o le la'u o tino oti i luga o le loli. O nisi fitafita o le matou vaega, ua na o le tutu mamao mai, ma faasuati, ma fetagisi. E le talitonu i mea ia o vaai atu iai.

Na ou matua le talitonu ina ua ou tago atu e sii se isi tino oti, ae ou te'i i le gaoioi o ponaivi. Aua e na'o ponaivi lava ma pa'u le tele o tino o loo la'uina. Na ou vaai lelei atu, ma ou iloa ai, o tau gaoioi mai foi isi ponaivi, o tagata e le'i feoti, a o loo ola pea. A ua faaputu faafafie e fitafita Siamani a o lei oo atu fitafita Amerika, e sauniuni ai e ave e tanu, tanu faatasi e ua oti ma e oloo iai lava sina ola. Na ou taumanuo i foma'i e nanati mai. Na oo mai ma latou toe la'ueseina tino nei e ola e le'i feoti, ma ave ua amata ona ona fufulu o latou leaga, ma fai iai togafiti.

E lua itula o o'u galue i le loli "fafie" tagata. E lua itula o manogi leaga; lua itula o le ita; lua itula o le inoino ia Siamani; lua itula o le faanoanoa; lua itula

faacacau itulau e 12

'Faauta, o le tagata 'aitele ma le inu uaina': Iesu ma le 'Au-Faalaa

uiga o le upu 'talia' - lea o loo faa-Samoa ai le *prosdeksetai* (welcome/receive). Talu ai ona o Iesu o le faalaa, lona uiga e le o ia o talimalo, o ia o le malo. Lua, o le upu 'talia' pei ona faaliliuina ai le *prosdeksetai* i le Luka 15:2, e faatatau tonu lava na o 'tagata agasala', e le aofia ai 'tagata ao lafoga'.

O le *prosdeksetai* e fetau lelei i ai le 'talia'. Ae talia faapefea? Fai pe faatino iai 'le alofa faa-talimalo' (receive hospitably). E iai le taofiga o le pepa, o se faauigaga talafeagai lea o le 'talia' pei ona faogaina ai foi e Paulo i le Roma 16:2 ma le Filipi 2:29. O le augani a Paulo i le ekalesia i Roma, ina ia 'talia' Fipe - i le Alii - faapei ona tataui i le au

paia. Faapena foi le lagona o Paulo i le au Kerisiano o i Filipi ona o Epaferot: "O lea ia outou talia ai o ia i le Alii ma le olioli uma lava." Lona uiga ia, o le 'talia' o loo faamauina i le Luka 15:2 - 'Ua talia e lenei tagata o e agasala, ua aai faatasi foi o ia ma i latou' - e le ona o Iesu o loo talimalo i ni taumafataga; ae ona o Iesu o loo faailoa lona alofa e 'talia' ai tagata agasala e mulimuli ane ia te ia. E atagia ai foi i mau ia le isi uiga loloto o le 'talia' poo le *prosdeksemai*. O le tagata o loo ia 'taliaina' isi tagata, ua ia te ia le matafaioi e nafa ai ma le vaaiga o tagata ia ia mautinoa lo latou maua o mea e ola ma saogaloemu ai (a

guarantor).

Aisea e 'talia' ai e Iesu tagata agasala, ae le o ia o talimalo? I le Mareko 2:14-17, o loo ta'ua le auai o Iesu i le faaafa Levi, le ao lafoga. O loo manino foi i le tala lea le toatele o tagata ao lafoga (tagata tali tupe) ma tagata agasala, o e sa mulimuli ane ia te ia. Atonu o le tala faavae lava lea e tasi e pogai mai ai le tala a Luka (19:1-10) ia Sakaio le ao lafoga sili.

I le Mareko 2:15-17, o le auai o Iesu ona o ia o le malo faaaloalogia, lea foi e mafua ai ona auai ane ma tagata agasala, o i latou o uo (umbroi) a Iesu. O le auai ane o tagata agasala ona o le matafaioi a Iesu, ia maua e tagata ia se meaai ma se uaina mai taumafataga o auai atu ia iai. A fua foi la i le Luka

'Faauta, o le tagata 'aitele ma le inu uaina': Iesu ma le 'Au-Faalaa

15:2 pei ona talanoaina muamua, o le 'talia' e Iesu o lo latou aai faatasi ma tagata agasala - e mafua ona o ia o le *guarantor* o tagata ia. Lona uiga la, Iesu le malo faaaloologia a Levi i le Mareko 2:15-17, a o Sakaio i le Luka 19:1-10, ae mulimuli ane ai ma tagata agasala - o uo a le o avea ma malo faaaloologia - ona o le tiute alofa o Iesu i ai latou nei, o ia o le *guarantor* o i latou o mulimuli ane, aua e mafua ona auai ane tagata agasala ona o Iesu.

O le isi foi manatu, o le au talimalo i tala e lua, Levi ma Sakaio - o le faailoga o lo la salamo. Amata atu ia Sakaio, o ia o le tagata agasala i le manatu o tagata Ieriko na latou iloa o loo iai Iesu e tali le faaafefe a le ao lafoga sili. Peitai e le o lea le finagalo o Iesu. O Sakaio e le o se tagata agasala, aua na ia fetalai, "Ua oo mai le faaolataga i le aiga nei i le aso, ina ua fai (kathoti) o ia ma atalii o Aperaamo." Ua avea Sakaio ma atalii o Aperaamo ona o lona talimalo. E eseese lava manatu faamataupu silisili i le faauigaga o le ta'u o Sakaio o le 'atalii o Aperaamo'. A o le taofiga o le pepa, na mafua le ta'u o Sakaio o le 'atalii o Aperaamo' ona o lona fesootaiga ma le faiva talimalo o Aperaamo. I le Kenese 18, o loo faamatalaina ai le talimalo o Aperaamo i tagata o le Atua, agelu e toatolu; a o le tala ia Sakaio, o lana taligamalo mo Iesu, le atalii o le Atua. Atonu o le ala lea o le faaigoa e Luka o le ao lafoga sili ia Sakaio - aua o le uiga o lona igoa 'o le tagata amiotonu'.

Afai foi la e toe autala le Mk 2:14-17 ona o le mafaufauga mai le Luka 19:1-10, e mafai foi ona tulai mai se manatu o Levi o le tagata amiotonu, ma ua ia maua le faaolataga e ala mai i lona faatino o le talimalo mo Iesu ma tagata agasala. I lea lava mafaufauga, e talafeagai ai foi ona faapea se

manatu, pei lava e le tatau le tuufaatasi o tagata ao lafoga (talitupe) ma tagata agasala o se vaega e tasi. E ese le au ao lafoga, ese le au agasala. O tagata tali tupe o i latou ia o loo talimalo ia Iesu; a o tagata agasala o i latou ia o loo manuia atu ai ona o le agaifanua o le faalaa, aemaise lava la pe afai o Iesu o loo valaauina i se taumafataga. O le tiute ('talia) o Iesu o le mautinoa o maua e tagata agasala se taumafataga ona o ia lea e mafua ai ona auai atu tagata ia - o le ala o le faaolataga i le itu i le tino (physicalsalvation). Lona uiga, e a Levi poo Sakaio e talimalo mo Iesu, a o loo talimalo ai foi ma Iesu i tagata agasala ina ia faaolaina, ina ua maua se taumafa ma se uaina e maua ai le malosi o le tino.

O le autalaina foi o le tala i le talimalo o Levi poo Sakaio, tatou te iloa ai le finagalo o Iesu i le faaogaina o le tamaoiga ua maua e le tagata. Atonu e mafai ona faapea se manatu, ina ua valaau e Iesu Levi e tuua mea uma ae mulimuli ane ia te ia, e lei aofia ai lona tamaoiga (Lk 5:27-28), pe na faatotoe foi nai nisi vaega. Aua afai na foai pe lafoai foi e Levi ana tupe uma, e le o iloa la pe na faapefea ona fai lana taligamalo o ta'ua i fuaiupu o loo mulimuli ane ai (Lk 5:29-30). E tuu faafeagai ma le tala i le tagata na momo'e ane e fesili ia Iesu pe faapefea ona maua le ola faavavau, pei ona faamauiina i le Mareko 10:17-22. Na faatonu e Iesu e faatau atu mea uma oi ia te ia ma foai i tagata matitiva, ona faatoa maua ai lea o le oa i le lagi. O se poloaiga na matua tiga ma faanoanoa ai le uso lea. Ae o se faatusatusaga e fesoasoani i le mafaufauga e uiga i le taua o le talimalo, o se ala o le faaolataga pei ona faia e Levi. O le isi foi mau e fetai ma lea mafaufauga, o le taua o le ola talimalo i le finagalo o Ioane le Papatiso (Lk 3:11), o se ala o le faaolataga.

O se itu taua o iloa i le agaifanua o le talimalo, o i latou o faatinoina le agaifanua lea, e mafai ona faamatalaina o e ua suia o latou mafaufauga (metanoia/repent), aua o lo latou faiva talimalo o loo auuala atu ai le faaolataga mo isi. A manatua foi le tala i le mauoa ma Lasalo (Lk 16:19-31), o lona le alofa ma le talileleia Lasalo na fai ma ona pona pei ona faamatalaina e Aperaamo ina ua oo i le lagi i laua nei.

O 'tagata ao lafoga' e eseese lona faauigaga. I nisi o suesuega patino i le faagasologa o pulega a le malo o Roma i ona itumalo sa ona pulea, o loo manino ai se toe vaavaai i le faaogaina o le upu 'ao lafoga'. E iai se talitonuga maumaututu, o 'ao lafoga' i le vaitau o Iesu (uluai seneturi) o tagata tali tupe (toll collectors), ae le o 'ao lafoga' pei ona iai a o lei soifua mai le Alii (demosiones), ona e tele se eseese o ia foi ituaiga galuega. Peitai, o le ata o ao lafoga o loo iloa tele i evagelia e fa, e mafua mai i le taimi mamao atu i tua atu o Iesu, ae le o atagia tonu ai lea foi ituaiga galuega i le vaitau o soifua le Alii. O se manatu e fetai ma 'ao lafoga' o loo taua i le pepa, o le au tali tupe o faia la latou galuega mo le manuia o le itumalo o galulue ai. Peitai, e le aveesea ai lava le tilofia o la latou galuega ona o le tuuaiga o loo faifai mea faatasi ma tagata ese o loo pulea i latou, le malo o Roma faatasi ai ma le fesiligia pea o le amiotonu i lea ituaiga galuega.

Aotelega:

O le tuuaiga o Iesu - o le tagata aitele ma le inu uaina - e mafua mai i le auai i taligasua e lei valaauina iai. O se gagana taufaifai o loo faamanatu mai ai le taua o le tagata faalaa, ma le taua foi o le o loo saili manuia iai le au faalaa. O loo iloa ai foi nisi o ala o le faaolataga na mafua ai ona 'talia' e Iesu tagata agasala e muliuli ane ia te ia, aemaise lava o taimi e avea ai o ia ma malo faaaloologia a nisi, pei o le toalua o le au talitupe, Levi ma Sakaio.

Ae o nisi o faatupu manatu, atonu

faacacau itulau e soso ai

Malumalu Fou i le Fanua ma'oti mo le Aulotu EFKS i Lano

galuega.

A o faagasolo le galuega, e toatele lava tama fanau a le nuu sa tuuina atu ni a latou fesoasoani mo le galuega. O le masina o Oketopa 2010 na taunuu mai ai le laveai mai alo ma fanau a le afioaga i Sini, Ausetalia. O le latou taulaga e \$120,000.

E tele vaega o le malumalu sa faameaalofaina atu e nisi o le aulotu ma le Ekalesia. E pei o faitotoa, tiles, nofoa, faamalama, pulelaa, P.A. System poo le faaleotele leo, ma laulau.

O le vali, moli, fale tautua ma isi faaopoopoga pei o le potu faamanatuga, potu tatalo mo le

faifeau, faaopoopoga o le auala savali i autafa, faaopoopoga o le *stage* mo tamaiti, fale tautua e tolu, faatasi ai ma lo matou faatamala iina ua le uma ona faatauina pepa o le 'aiga ma isi mea, o le mafuaaga lea o lo matou nofo aitalafu i le \$150,000.

O le tupe lava na faatino ai le galuega e \$328,420.41, e aofia ai ma le aitalafu e \$150,000. A o le tupe na fuafuaina e fau ai le falea e \$350,000. O lona uiga ua itiiti le tau ua faatino ai le galuega ona o ofo mai aiga o le nuu, faapea ma tama fanau a Lano i Samoa nei ma nuu e mamao.

FAAFETAI:

* Faafetai i matua faaleagaga ona o le tatalo ma la matou anapogi mo leni galuega. O le faavae papa lea o la matou galuega.

* Faafetai i le Ekalesia Aoa ma le pulega mo le faamalumaluga mo le nogatupe i le faletupe atoa ai ma tatalo.

* Faafetai i le aiga o Faalavane ma sulii uma mo leni foa'i taua mo le Atua. O le eleele ua iai le lotu faapea ai maafola (tiles), atoa o le falea i totonu. Faafetai i le kamupani o le P&P Enterprises, Ben Lei Sam ma le aufaigaluega.

* Faafetai i le aiga o Lemoa mo eleele faapea foi Mulitalo mo oneone sa la'u mai mo le tanuina o le fanua.

facaauai itulau e 12

'Faauta, o le tagata 'aitele ma le inu uaina': Iesu ma le 'Au-Faalaa

e talafeagai foi ma nisi faitauga ma faauigaga o nisi o mataupu masani o le Tusi Paia, aemaise lava i le Feagaiga Fou, pe a toe autala i le mafaufauga o tau faaata atu i le pepa - le taua ia Iesu o le talimalo.

Alofa i e ua fai ma fili:

I le Lk 6:32-36, o loo faamauiina ai le finagalo tulaga ese o Iesu i tagata o fai ma fili, atonu e talafeagai foi pe a faamatalaina mai le faauigaga o le talimalo. O lana aoaoga ia aua nei alolofa atu tau o i latou o alolofa mai; aua le agalelei atu tau o e o agalelei mai; aua foi le nono au tupe tau o i latou e toe maua mai ai faatasi ma le faasiliga - e mafua la ona o loo fai foi e tagata agasala ia foi faiga. O le faaogaina o le upu *hamartoloi* poo 'tagata agasala' i fuaiupu 32, 33, ma le 34 o loo faatatau tonu lava i tagata amio leaga, tagata soli tulafono, ese mai i tagata agasala o mulimuli ia Iesu ona o taumafa.

O le finagalo o Iesu i le f.35:

"Peitai outou, ia outou alolofa i e o fai outou mo latou fili, ma ia agalelei atu, ma ia avatu tupe e nonoina, aua le faamoemoe i se mea e tasi e au mai; e tele ai lo outou tau, e avefa foi outou ma fanau a le Silisiliese; aua o ia le agamalu i e agavale, atoa ma e amio leaga." O le aoaoga lea a Iesu o loo agai i le fuli faafao o le aganuu a tagata Roma ma Eleni o le 'faapaleni o le alu atu ma le toe foi mai' (balanced reciprocity), aua ua ola ai foi ma tagata Isaraelu ua lofia i ia foi faiga. O le augani a le Alii o loo manino i ana saunoaga o loo faamauiina e Luka, e agai i le toe faaolaola o se tasi o agaifanua sa masani ai tagata o ia aso, o le ofoina o le fesoasoani (hospitality) faa-talimalo, lea e ta'ua e nisi o le au suesue o le generalized reciprocity poo le fesoasoani e le faatitilo i se tau.

Peitai, o se aga sa patino lona faatinoina i totonu o le lotoifale o aiga, sa iloa tele i sosaiete a tagata e tutusa o latou faiva; poo

faalapotopotoga foi a e e masani le tasi i le isi. E le soona faia mo soo se tasi. Ae o le finagalo o le Alii, ia tatala i tua tuaoi o le aganuu lea ina ia aofia ai soo se tagata, ina ia manuia ai tagata uma, aemaise lava i tagata o loo i fafo atu o laina tuaoi ua faatulagaina. A o le uiga tonu lava lea o le ola talimalo (floknesia) i lona faavae mai - o le alofa i tagata e le masani, tagata o nuu ese, poo i latou o fai ma fili. O le faiga e finagalo iai Iesu o loo faamanino i le Luka 14:12-14. A valaaulia nisi i se taumafataga, valaau i latou e le mafai ona latou tau mai lou agalelei. O se feau o loo momoli mo i latou o faalogologo ai i lea taimi i le taua o le 'talimalo', aua a latou 'talia' i latou ia e naunautai i ai le finagalo o Iesu, o lo latou faatinoina lava lea o le faaolataga, ae o se avanoa foi e faatino ai lo latou tauamitonuina ia ua latou faia le finagalo o le Alii, o le alofa i soo se tagata. E talafeagai lea vaivaiga?

Ia manuia le Mafutaga!

A.Eteuati - 2010

'Aisea na fia avea ai ma faifeau

o le alofa; lua itula o le fememea'i ua ta leiloa se mea e fai e faaali ai lo ta ita. E leai ni upu e mafai ona faamatala ai lagona eseese na oo mai ia te au ina ua ou vaai i nei mea.

Na mae'a ona matou galulue i le la'uina o tino oti, ma la'u ese tino o loo ola pea lea sa faaputu faatasi ma tino oti, ona matou liliu atu lea i le fale o loo ua lokaina ai nei fitafita Siamani ia sa latou leoleoina pagota o le taua mai Amerika ma Peretania. O le fale lea ua iai se vaega o matou latou te suesueina fitafila leoleo nei a Siamani ua maua.

O le fale e i le isi itu o le vanu. E leiloa atu i le maualuluga ma le putuputu o laau o le vanu. Na valaau mai lo matou taitai i se tasi o matou e ofo atu na te avea se isi vaega e to'a 12 o fitafita Siamani i le fale lea i le isi itu o le vanu. Na vave lava le ofo atu

a Siaka ma sii lona lima. O Siaka o se fitafita itaita gofie. E tau le kea i se isi. E matua le fefe i se isi. Tai fufusu lava ma se isi o matou i aso uma.

I le o Siaka lea ua sii lona lima. Fai mai tala o Siaka sa iai i kegi a le tagata tautaua o Al Capone i Amerika. O foliga o Siaka ta te talitonu ai i tala ia. E le taumate lava sa avea o ia ma se tasi o tama a Al Capone na te faaoo le oti i nisi o ona fili.

Na uma ona sii le lima o Siaka, ona tago atu loa lea ua sii mai le fanataavili ua amo i le ua. Ua savali atu ma 'e'e i pagota fitafita Siamani ia o le a alu e momoli i le isi itu o le vanu. Na tuu lima o Siamani i luga o o latou ulu ma savavali faatopetope, e muamua i luma o Siaka. E lei umi ona lilo atu i totonu o le vao o le vanu, ae o matou faalogoina le 'ote'ote mai o le fanataavili. Na matou fesulua'i solo ma lalafi faapea matou o ni fitafita Siamani o lalafi ma ua tafana mai matou. Ae matou vaai atu, ua savali mai Siaka ma lana fanataavili o loo pupusa le asu i lona gutu.

Fai mai Siaka, "Fua a le la o le le usitai. Ou te fai atu iai e tatope le savali ae le tatope le

savali. Tatope loa iai la'u fanataavili."

Na ou fesili i le faifeau pe na molia Siaka ona ua ia faaoo le oti i pagota o le taua ona e sa i tulafono faavaomalo. Ae vaai mai le faifeau ia au e pei e le talitonu i la'u fesili na fai atu. Ona tali mai ai lea.

"E le'i faia se mea ia Siaka e o matou taitai. Ma o ina na oo mai ai ia te au le lagona, ou te fia fai ma faifeau. Muamua, o le mata'utia o lo'u vaai i tino maliu i le uta a le loli, o faaputupupepe i ni fafie. Matua faigata ia a'u ona ou talitonu e oo tagata i ni mea faapea. Peitai ina ua ou vaai iai, ona ou matua lagona ai lea, e tataua ona avea au ma faifeau, ou te auauna atu ai i le Atua, ou te tetee atu ai i nei mea leaga o tutupu mai i le lalolagi.

"Na ou manatua foi Siaka. Na ou popole nei tofi mai au ou te leoleoina ma momoli se isi vaega o pagota Siamani i le isi itu o le vanu. E le taumate ou te tafanaina foi ma fasioti, e tau faamalie ai lagona tiga ia o pupuna a'e i lo'u loto, ona o tino oti ma tino ola ia e faaputupupepe i se uta fafie i luga o le loli."

faaauau itulau e sosoo ai

Malumalu Fou i le Fanua ma'oti mo le Aulotu EFKS i Lano

* Faafetai i alo ma fanau i Niu Sila sa fesoasoani mai mo le fausia o le maota o le faifeau, ma le maota o le galuega.

* Faafetai i o matou aiga uma aemaise o o matou paolo tau i le Atua o le taulaga a le Susuga Leifi F.S. ma le EFKS i Saipipi ma le aiga o Tataua e \$3,000 sa faaogaina mo pou teuteu i le malumalu.

* Faafetai faapitoa i le Susuga i le faifeau o Mareko ma le faletua

ia Elise, Susuga i A'oa'o ma le Ekalesia Faapotopotoga a le Atua i Lano, e faafitu ona outou agalelei mai. O outou lava o Samaria agalelei. Ia viia le Atua ona o la outou galuega faatino o le soifua faaleagaga.

* Faafetai tele i suli o Liuvao Tuiloma F.T., Euta Moemai F.T., Amosa Matalavea F.T., Levi Malagamalii F.T.. O le a manatua pea a outou taulaga.

* Faafetai i le faifeau ma le faletua mo le la'o'ai o le Faamanatuga Paia, suli o Faalavane Uili mo maafola, (tiles, suli o Mulitalo Malu mo PA System, Moli Tele ma ili, Mafutaga Niu Sila mo le tupe e

NZ\$30,000 na mafua ai ona fausia le maota o le faifeau.

* Faafetai mo le aiga ma le fanau a Tufi na maliu i le po o le aso 28/5/10 o le sailiga tupe mo le falesa, mo le pulelaa.

* Faafetai i le Susuga Epati F.S. ma fuafanua mo le fuaina o le fanua ma le resitaraina faaletulafono.

* Faafetai i le pulega o le Wiri Pacific Ltd, aemaise Iona Levi o se tasi o suli o le aulotu nei, o ia lea sa taulamua i feutanaiga, le tau o oka o le falesa mai Niu Sila. Faafetai foi mo Tupa'i Viliamu Alaovae mo fesoasoani i togoti

faaauau itulau e sosoo ai

Mai le Ta'otoga i le Fatu i le Filemu o le Atua

"Se ala ia, Hepati! Matua leva ona e moe! Ala ia!" O le musumusu lea a Selia Kelenifili i le taliga o lona toalua, ma uu lona lima, ma vaai taula'i atu i masini o fuaina le tata o le fatu o lona toalua.

Ua atoa nei le tolu o aso talu ona uma le ta'otoga o lona toalua i lona fatu, ae o lea lava e le'i ala mai. Ua toe manatua e ia le taimi tusa ua atoa le vaiaso na fai ane ai le fomai ia Selia, e tataua ona

taoto vave lava lona toalua i lona fatu. E tele se taimi o tau faavasega e Selia le uiga o le faamatalaga a le fomai. Ta'otoga o le fatu? Ae faapefea pe a oti ai lo'u toalua? Ua faalogo ifo Selia i lona foi fatu, ua alu i le atoa i le popole. O le mea na ofo ai Selia, o le loto tele o Hepati. Ae o lea lava e oso le mafaufau o Selia i le popole. "O le a nei le mea ou te toe mafai ona fai pe a le toe ala mai Hepati i le ta'otoga?" o le popolega lava lea o Selia.

Ua te'a le vaiaso. O loo faatalitali Selia ma lana fanau o Tieli ma Risati i fafo o le potu o fai ai le ta'otoga. Ono itula talu ona amata ona fai o le taotoga, ae sau i fafo le fomai. Na fai atu o ia ia Selia, Tieli ma Risati e

nonofo i lalo i nofoa o loo iai. Ona fai atu lea, "O le la ua i le potu e ave iai ma'i pe a uma ona fai o latou ta'otoga i le fatu. Na fai si faafaigata o le ta'otoga. E fa paipa o le fatu ua sui."

Ona faatalitali ai lava lea o le aiga mo le ala mai o Hepati. Lua itula, tolu, fa e lei ala mai lava. Ona fai atu lea o tama i lo la tina e sili ona momoli o ia i le fale e fai sa na malologa ae telefoni atu pe a ala mai lo la tama. Ae nonofo ai la'ua i le falemai. Fiu Selia e tatali se telefoni e leai. O le aso na sosoo ai na o atu ai tama ua aami lo la tina. Sau Selia i le 'u'u le lima o lona toalua ma oomi, ae leai se gaoioi mai e faaali ai o ia lagona se mea.

faacinau itulau e 14

'Aisea na fia avea ai ma faifeau

Na toe feliiua'i le vaai a le faifeau mai lea itu i lea itu, ona

toe fai mai ai lea:

"Na ou mafaufau foi, pe o le a se mea e oo iai le lalolagi, pe ana iai se teine lelei, amio lelei, na te faauoina Hitila, ma nonofo ma Hitila, ma faufautua i lona mafaufau fenumia'i a o taule'ale'a. Atonu e le oo le lalolagi i se Taua Lonalua a le Lalolagi; ma leai ai se Takau; leai ai ni manogi leaga i nei

nofoaga; leai ai ni pagota e momoe i luga o o latou moega ma fai ai lava a latou fe'au ona ua mama'i ma faatalitali oti; leai ai foi ma ni loli o faaputupu ai e pei o ni fafie le uta o tagata oti ma tagata o loo ola pea."

Philip Yancey
faamatalaina e
Afemata T. A. Aiavao

Malumalu Fou i le Fanua ma'oti mo le Aulotu EFKS i Lano

o uta mai le PFL.

* Faafetai i le Susuga Masi Iona ma le au kamuta mo le faatinoga o le pulelaa, potu o le Faamanatuga ma le potu mo le faifeau.

* Faafetai i le Afioga ia Vui Tupe ma le faletua, Tofa Malaeculu Torise ma Nele mo le fesoasoani mo maafola, (tiles) i fafo ma ipu Faamanatuga.

* Faafetai i le Tofa Vaelua Pule mo apefa'i ma maca sa fesoasoani tele i lenei galuega.

* Faafetai mo le Susuga ia Mate

Malaeculu mo le Tusiina o le igoa ma ata mo le malumalu.

* Faafetai ia Malagamaalii Fosi Vui ma Mulitalo Tuufua mo pemitā o le phase 3 ma faia o moli mo le falesa.

A iai se isi ua matou le taua lona suafa, ia faapea ona oo atu iai la matou faafetai. Faafetai mo i latou sa agalelei mo taumafa i soo se ala mo lenei galuega.

E mulia'i ae le faaitiitia ai la matou faafetai tele i le Afioga i le Aigaotupu le Tofa ia Mulitalo Faamoe Fautua ma le tapuaiga i le meana'i taua ia Silia. Faafetai i le Falefa o le Aiga Sa-le-malama, fanau galulue a le aulotu. O se galuega sa faia i le faatuatua pei ona a'oa'o mai le Matai o le galuega, e

mafai mea uma i le faatuatua.

O uluai upu mai le fofoga o le Alii Toetu: "Ia outou manuia".

Soifua.

Mulitalo S. Vui

Taitaifono, Faafeagaiga ma le Aulotu EFKS, Lano.

The Gospel in India:

Despite the many bumbling errors of paternalistic missionaries, the Christians have given India an inspired legacy of education and medicine. If you say the word "Christian" to an Indian peasant - who may never have heard of Jesus Christ - the first image to pop into her mind may well be that of a hospital, or of a medical van that stops by her village once a month to provide free, personal care in Christ's name. It's certainly not the whole of the gospel, but it's not a bad place to start.

O E ua au I Su'ega A'oa'o Fesoasoani 2010

1. Lutia L. Hytongue	Apia Sasae
2. Tulusina Pouli	"
3. Pokati T. Aimaasu	"
4. Fetuao Taai	"
5. Leuta S. Valoaga	"
6. Tolofuaivalelei F. Leiataua	Apia
7. Tupuola S. Opa	"
8. Palaialii P. Sooalo	"
9. Itutu Toetu	"
10. Tuigamala A. Vaiotu	Faleata
11. Saulo M.F.Pemita	Malua
12. Leaupepetele Filipino	"
13. Taupa'u M.L. Paniani	"
14. Tafia Eteuati	Aana
15. Tafafuna'i S. Chan Kau	Falealili Sisifo
16. Mautoatasi Ola	"
17. Seve Samuelu	"
18. Potifara Tago	Niusauelese
19. Seiuli T. Nafo'i	"
20. Tuitama V. Foaiaulima	"
21. Fetulima Seualuga	Ituotane
22. Seleni Utumapu	"
23. Tuipoloa Pasene	"
24. Pelenise Ivana-Tolua	"
25. Latumaivai Simati	"
26. Paeu Talatonu	Faasaleleaga
27. Tui Afato	Amerika
28. Tanu Tofi	"
29. Soavele H. Fofoa	Niu Sila i Saute
30. Mataafa D. Amosa	Fiti
31. Toetu I. Tuia	"
32. Eteuati Mulinuu	Manukau
33. Valoaga T. Ropati	"
34. Lealali I. Leilua	"
35. Anae L. Tuifao	Kuiniselani
36. Misa Rolagi Koko	Vitoria
37. Luaitalolelei A. Letoga	"
38. Puipuifatu P. Tuimaseve	"
39. Leatuvao O. Esera	Aukilani
40. Suliveta Ulutunu	"
41. Muliaga A. Tuaimalo	"
42. Sao Fetalaiga	"

FAASA'OGA: O le Sulu o Oketopa 2010 itulau e 5, o loo lolomi ai le lisi o i latou ua pasi mo le Kolisi Faafaifeau i Malua. O loo lolomi ai le suafa o Silipa Silipa ma tusi ai o Aana e ulufale mai ai. O le faasa'oga, o Silipa Silipa e mai le Matagaluega a Apia Sisifo.

Mai le Ta'otoga i le Fatu i le Filemu o le Atua

"Le Atua e, o le a le umi ae ala mai ai?" o le tatalo le leoa lea a Selia. Na sau o ia i fafo ma le potu o le ma'i, alu ua telefoni sa na uo i le latou A'oga Tusi Paia ma talosaga iai se'i tatalo mo Hepati. Oo i le aso lona tolu e leai lava se ala mai o le ma'i.

O lona sefulu o aso talu ona uma le ta'otoga na faapotopoto ai le aiga e le fomai ma fai iai, "Ta outou malilie, ae ou te fia ta'u atu ia outou, e le toe ala mai Hepati. Ua umi tele ona moe. E le taumate ua le lava le okesene i lona fai'ai i le taimi o lona taotoga. Tusa lava foi pe toe ala mai nei, e le tauamte lava le aafia o lona fai'ai ona o le leai o se okesene."

Na pei ua tei lava ua pogisa atoa le mea i le vaai a Selia. "Le Atua e, o fea o e iai? Aisea ua e le tali mai ai ia matou tatalo?" O aso e lua na sosoo ai, e lei alu i le falemai a ua nofo i le fale. O le faaaliga a le fomai, o le a tase'i ese faaga'au o loo faaola ai Hepati i le isi 48 itula pe a leai lava se suiga. E lei manao Selia e iai i le falemai i lea taimi. Na ia toe telefoni lana uo o Ioana i le A'oga Tusi Paia, ae le faavaivai Ioana. "E le faapea e le mafai e le Atua. E le o le Atua le fomai!" o le tala lea a Ioana ia Selia.

Na ta'ita'ia talosaga i le A'oga Tusi Paia e Ioana. "Le Alii e, matou te talitonu e mafai lava ona e toe faaala mai Hepati ma foaiina atu ia te ia le malosi atoatoa. Ae poo le a lava lou tali mai, le Atua e, alofa ma foai mai ia Selia i lenei taimi le toafilemu i lau Afio."

Ua tau atu nei Selia i lavalava o lona toalua i lana pusa, ona tagi ai lea. Na ia manatua le Isaia 26:3: "E te leoleoina ia ffilemu lava le ua mausali lona loto; aua ua ia faatuatua ia te oe." Ona manatu ai lea o Selia, tusa lava pe o le a le mea e oo iai, ua faamafanafanaina o ia.

Na manavanava tetele Selia ina ua tatagi le telefoni. Na ia faalogoina le leo o le fomai, "Selia, ua ala Hepati! Sau loa e vaai iai!"

Ua tali le Atua i talosaga. Ae na popole lava Selia, nei ala mai, a ua iai nisi uiga faaletonu i lona mafaufau. Peitai na ia talitonu foi, o le Atua ua ia toe faaala mai lona toalua, o le Atua lava lea na te toe foaiina atu le malosi atoatoa.

Mary Lou Klingler
faamatalaina e Afemata T. A. Aiavao

O E UA MALILIU

LILO VAGAI SALESULU

25 Novema 1928 - 24 Setema 2010



O le tiakono i le aulotu EFKS i Frankston, Pulega Melepone i Saute, Matagaluega Vitoria, Ausetalia.

Na soifua mai o ia i le aso 25 Novema 1928, i le motu o Apolima i Samoa, ae goto le la o lona soifua i le aso 24 Setema, 2010 i le falemai tele, Monash i Melepone.

O ona matua, o Salesulu Fetoa'i o Apolima ma Tina

Fonoia o Salelologa. Sa faatiakonoina e le Faifeau Toeaina o Ulutui Latali Tia i le EFKS i Apolima-uta, i le tausaga 1971. Sa toe faaauau lona tofi tiakono i le aulotu lenei EFKS Frankston i le tausaga 1998 ina ua taunuu mai i Melepone i le 1996 ma matou galulue loa, seia oo ina maliu.

O ia o le moli 'emo'emo a Keriso, sa ola i Apolima, ma 'emo'emo foi i lenei itu lalolagi, o loo 'emo'emo pea i le lagi.

O se tasi o toa o le galuega atia'e a le EFKS i lenei aulotu ma le Ekalesia aua e toa lona loto, e toa ona lima ma ona vae, e silisili ona toa lona faatuatua ma lona alofa i le Atua e ala i lana galuega paia.

Sa faia lona sauniga faaleaiga (family service) i le afiafi o le Aso Sa o Tamaiti, 10 Oketopa, 2010, i le malumalu "O Aao o le Faavavau", EFKS Frankston. O au sa taitai, o Moe Tauti F.S. na tatalo, lauga Apelu Amosa F.T. - Faaaliga 2: 8, 10,11 - "O le pale

auro."

O lona falelauasiga na faia i lona nuu moni ma lana tapuaiga moni i Apolima-uta, Samoa i le Aso Tofi 14 Oketopa, 2010. Taitai i le sauniga Avele Utumapu F.S., faitau Tusi Paia Tapa Tuala F.S.. Molimau sui o le fanau, le aiga ma le aulotu faapea le faifeau o Avele Utumapu F.S.

Sa faaiu i la'u molimau ma le upu o le faamoemoe: "O Iesu o le malamalama o lo tatou ola." (Ioane 8:12). Ia tatou olaina lona ola, lona alofa, o ona puapuga ma lona manumalo, i le ola nei, ma le ola atali.

Ona ou faaiuina lea o ona toe sauniga i lona oliolisaga tumau i lona maota o loo lagomau ai i Apolima-uta. Matou faatofa i lenei auauna, tiakono a Keriso i le pese "Ia faatasi pea Iesu ma oe." Ia manuia oe le uso ma le auauna a Iesu. Soifua.

Iakopo Poufa Pesaleli F.S.
EFKS Frankston

Tuvale Siliga

5 Mati 1920 - 26 Setema 2010



Na soifua mai Tuvale i le aso 5 Mati 1920, ae na amia e le Atua i le aso 26 Setema 2010 ina ua 91 ona tausaga.

E ui lava ua le manatua e le tina le tele o mea i lona mafaufau ona ua tagata matua, ae sa malosi lava lona tino e fai ana feau e pei o le vevele vao i tafa fale aemaise o le tausiga o fanau a fanau a lana fanau o le tupulaga

lona tolu o e na tutupu mai ia ia. Sa galulue foi ma le tama i le tofi tiakono amata mai i le tausaga e 1979 seia oo ina valaau le Atua i le tama. E le itiiti tausaga o le tautua ma le auaunaga e pei ona fai mai o le tusi o a latou galuega foi e mulimuli mai ia te i latou.

O ona toe sauniga na faia lava i lana Ekalesia e pele, EFKS Lauili. O au na taitai i le sauniga; o le Epikopo ia Vaivai na saunia talosaga ae o le Tiakono Katoliko ia Ameto Ulugia na saunia le upu faamafanafana. O lana fanau o Leau Vaasa, Taala Mulinuu, Elisa A. ma Esau L na molimau. O Taumaoe Masaga ma le faifeau ia Tanielu Tanielu na fai ma sui o lona aiga. Ona faaiu ai lea i lona oliolisaga tumau ma faatofa i le pese faatofa a le Au Kerisiano. "O i

tatou ua tatou iloa ua oo i tatou i le ola sa i le oti, aua oloo alolofa i tatou i le au uso".

Tofa tina, manuia lau malaga.
- Pita Toleafoa F.S. - Lauili

Tapunuu Vailele

8 Aperila 1946 - 18 Oketopa 2010

Na soifua mai Tapunuu i le aso 8 Aperila 1946, ma papatisoina ai i le Ekalesia i le tausaga lava lea - 6 Oketopa 1946; ae valaau iai le Atua i le aso 18 Oketopa 2010.

O se tama e mamao lona fale mai le falesa, ae lei avea lea ma ala e faavaivai ai i sauniga lotu i Aso Sa uma lava. E toatele foi lona aiga, ae sa galue lava ia e ui

faaauau itulau e sosoo ai

O E UA MALILIU

ina e vaivai i nisi taimi. O lana taleni lava o le faifaiva. O le meaalofo lea a le Atua ia te ia sa ola ai lona aiga, faaooaga ai lana fanau, ma tautua ai le Ekalesia.

E naunau lava i galuega uma i le Ekalesia e ui e le se tagata e

matua malosi tele. Ae pei o la le aposetolo - "A ou vaivai ona ou malosi ai lea".

O ona toe sauniga na faia lava i lana Ekalesia i Lauili. O au lava na taitai. O le A'oa'o iu mai Malua ia Koriam. na faaulufaleina lona sa; o le Epikopo ia Vaivai na faia le tatalo, ae o le faifeau ia Patolo

Matalasi na saunia le upu faamafanafana. Ona faaiu ai lea i lona oliolisaga tumau i lona aiga.

"O la Iesu ou te le tuuna outou o e matua oti." Faamaise i le fanau ua tuua ona o le valaau i le tama.

- Pita Toleafoa F.S. - Lauili

O le Atua lo tatou malu mai tagata faatupu faalavelave

Salamo 91 f.1-6:

O le nofo i le mea lilo o iai le Silisili ese. e mau o ia i le paolo o le e ona le malosi uma lava. Ou te faapea atu i le Alii: O lo'u malu o ia ma lo'u olo; o lo'u Atua ou te faatuatua ia te ia. Aua o ia na te laveaiina oe i le mailei a le fai manu, ma le faama'i e oti ai. E ufiufi ifo o ia ia te oe i ona apaau, e te sulufai foi i lalo o ona apaau; e faia lona faamaoni mau talipupuni ma mea e puipuiina ai oe. E te le mata'u i le mea mata'utia i le po, ma le u fanafana e lele i le ao, o le faamai e fealuai i le pogisa, ma le mala e fano ai i le aoatea.

O le faatupu faalavelave faamata'u, **terrorism**, poo tagata faatupu faalavelave faapapa pomu, **terrorists/suicide bombers**, o se mea ua matua atugalua ai nei le lalolagi. O vaega o le lalolagi o loo ua matua sasao ai lea faafitauli, o Europa, Sasae Tutotonu (Middle East poo atunuu ia o ta'ua i le Tusi Paia), Asia ma Aferika. O loo ua aafia lotu i faiga faapolokiki. Ua fevaa'i Kerisiano ma Moselemu; Hindu ma Moselemu; Isaraelu ma Moselemu. O isi foi Moselemu ua faasaga tau i isi Moselemu. O vaega ia o le lalolagi o loo ua tele ai le faapapa pomu o tagata (**suicide bombers**). O tagata ia e fusi pomu i o latou tino, fai atu ai i luga o latou ofu e nana ai, ona o lea i se

mea e tumutumu ai tagata ia latou te mananao e fasioti, ma faapa ai, ma feoti atu ai, faatasi ma se anoano o tagata o le a maliliu atu ai fua i faiga a ia tagata faapapa pomu. O le isi faafitauli i nei tagata faapapa pomu, ona o lo latou talitonuga, a feoti ai, e o sa'o lava i le manuia i le lagi, ona o loo latou faia nei mea ona o talitonuga a a latou tapuaiga.

O le faaogaina e ia tagata o lea faiga o le **suicide bomb**, poo le "oti ai i lana pomu", o lo latou faaogaina lava lea o le faamata'u, poo le faafefe o tagata, ina ia aua nei o latou faia mea ia e tetee mai iai le au faapapa pomu. O le tau faamata'u lea ma le tau faafefe, e le toe to'afilemu ai se atunuu. O le a fefefe ai tagata e toe o i ni nofoaafi i lalo o le eleele poo luga foi. O le a fefefe ai foi i malaga i vaalele, poo vaa o le sami. O le a fefefe ai tagata e o i ni taaloga e tumutumu ai le afe ma afe o tagata. Mo Kerisiano, o le a ono fefefe ai Kerisiano e fau ni o latou falesa ma tapua'i i le Atua i o latou talitonuga i le Silisiliese, pei o le mea lea na tupu lata mai nei i Aikupito na faapa ai se pomu e se suicide bomber i se mea o fai ai se sauniga lotu a Kerisiano ma maliliu ai ni tagata se toatele. Pei foi ona tau faafefe i le faapapa pomu faasaga i Kerisiano i nisi o atunuu i Asia ma Sasae Tutotonu ina ia aua ai ona sosolo le lotu Kerisiano i ia atunuu.

O le mea faigata i le tau taofiofia o nei tagata faapapa pomu, ona o o latou talitonuga, a feoti, e o sa'o i le manuia i le lagi, ona o loo latou faia nei mea ona o o latou talitonuga i lo latou Atua. E le taulia i le latou vaai le maliliu ai fua o le anoano o tagata ia latou pomu o faapapa. O lona uiga foi la, a fia vave alu se isi o ia tagata i le manuia i le lagi, e tusa o o latou talitonuga, faapa le pomu e oti ai, tusa pe maliliu atu ai ma nisi tagata e toatele.

Peitai ua aumai e le Salamo e 91 se fautuaga: Faatuatua pea i le Atua. Tuu pea ai na te leoleo tatou. Lelei. Ae faapefea Kerisiano ia na maliliu i le au faapapa pomu? E moni. O lo tatou saogalemu e faavavau. E le na o le saogalemu i le lalolagi nei. O lo tatou oti mai ia faalavelave, e ave ma mea na o le sui ai o lo tatou tuatusi. Ua le o le mea o tatou nonofo ai i le lalolagi, a o le manuia i le lagi. Pei ona fai mai Paulo i le tusi o le Filipi 1: 21: "Aua o lo'u ola ua ia Keriso lea; a o lo'u oti, o lo'u manuia lea."

Tatou te le fasiotia se isi ina ia tatou auala ai i le manuia i le lagi. Leai. Leaga o loo fai mai le tulafono: Aua e te fasioti tagata. Tasi lava le mea e taua, ia lelei lo tatou va ma le Atua. Tusa ai lava la poo le a le mea e oo mai, poo le ola poo le oti, a o loo tatou i le Atua. Ma e le fasioti tagata le tagata o loo i le Atua. Tatou te le faapapaina foi ni pomu ina ia tatou vave o ai i le Atua. Leai. Tatou te faatalitali ma le faatuatua i le taimi a le Atua.

- Afemata T. Apelu Aiavao